

**Buk in Petsac ke  
PENG MWO**



**ma in Tuhniyuhklac nuh sin  
Tuhlik**



Ke Elizabeth el pitutu malem onkosr, God El supalla lipufan Gabriel nu in siti srisrik se in acn Galilee pangpang Nazareth. Oasr sap soko el wis nu sin sie mutan fwusr virgin, su ako in payuk nu sin mukul se pangpang Joseph, su ma in fwil in tulig natul Togusra David. Een mutan fwusr sac pa Mary. Lipufan sac tuku nu yorol ac fwak, "Paing kom! Leum God El wi kom, ac El arulana akinsemwowoye kom!"

Mary el arulana fohsak ke kas lun lipufan sac, ac el suk na lah mea kalmen ma el fwak u. Na lipufan sac fwak nu sel, "Mary, nikmet sangeng, tuh kom ohi yurin God. Kom ac fwa pitutuyak ac oswela sie mwen, ac kom fwa sang eel Jesus. El ac fwa arulana fulat; ac fwa pangpang el Mwen nutin God Fulatlana. Leum God El ac fwa oru tuh elan sie togusra oana David, papa matu tumal, ac el ac fwa leum fwil in tulig natul Jacob ne tok; togusrai lal ac fwa wangin saflaiya!"

Luke 1:26-33

Na Mary el fwak, "Nga met kulansap lun Leum God. Lela ma inge in orek nu sik oana ke kom fwak." Na lipufan sac som lukel.

Luke 1:38



Joseph el som liki siti srisrik Nazareth in acn Galilee nu in siti srisrik Bethlehem in acn Judea, acn ma Togusra David el isusla we. Joseph el tuh som nu we meyen el ma in sruf lal David. Ke sripen el akoo in payukyak sel Mary, oru eltal tukeni som in tuh simla eelos. In pacl sac Mary el pitutu, ac ke eltal muta Bethlehem, sun pacl in isus lal. El oswela mwen se oemeet natul, nokmulla ke ipin nuknuk, ac fwililya in nien mongo lun kosro -- meyen wangin acn elos in muta we ke loom sin met fwasr.

Luke 2:4-7



Oasr kutu met shepherd in acn sac, su muta inima u ke fong sac in karingin un sheep natulos. Sie lipufan lun Leum sikyang nu selos, ac mwolana lun Leum kalmelik ac tololosyak. Elos arulana sangengla kac. Tuh lipufan sac fwak nu selos, "Nimet sangeng! Nga wis peng mwo nu sumwos, su ac fwa sang engan lulap nu sin met nukemwa. Tuh isusla nu sumwos mesinge in siti sel David, sie Met Lango, su Leum Christ! Pa inge me akpaye nu sumwos u: komwos ac fwa konauk tulig fwusr se pihpla ke ipin nuknuk, ac oan in nien mongo lun kosro."

In kitin pacl ah na, oasr sie U lulap ke lipufan in kosrao sikyang wi lipufan sac; elos on ac kaksakin God: "Mwolana nu sin God in fulatlana, Ac misla fwini fwalu nu sin met su El insemwowo kaclos!"



Tulig sac kapak ac kui ac el sesseslana ke lalmetmet, ac lungkulang lun God oan facI.

Luke 2:40



Ouinge John el tuku nu yen mesis ac el baptaisi met ac lotelos ac fwak, "Komwos auliyak ac baptaisla, na God El fwa eela ma koluk lomwos." Met puspis tuku liki acn Judea ac siti Jerusalem, ac som in lohng luti lal John. Elos fwakak ma koluk lalos, ac el baptaiselosla Infwal Jordan.

John el nokomang nuknuk orekla ke unen camel, ac me lohl losyen infulwal orekla ke kulun kosro, ac me mongo nacl pa locust ac honey inima. Ac el fwakak nu sin met u, "Oasr sie ac tuku tukuk su arulana fulat likiyu. Nga tia fal in sumwoli ac tulala ah losyen fwaluk lal. Nga baptaisikomwosla ke kof, a el ac fwa baptaisikomwos ke Ngun Mutal."

Tia paht toko na Jesus el tuku liki Nazareth in acn Galilee, ac John el baptaisella Infwal Jordan. Ac ke pacl se na el tufwana utyak liki inkof u, el liye in kosrao ikakelik ac Ngun oatui oana sie wuleoa, ac tuwi nu facl. Ac pusra se tuku in kosrao me ac fwak, "Kom Mwen kulo nutik. Nga insemwowo sum."



Na Jesus el utyak nu fwineol u ac pangoneni met su el lungse in oelul. Elos som nu yorol, ac el sulela met singoul luo su el pangon met sap. El fwak nu selos, "Nga sulekomwosla komwos in wiyu. Nga ac fwa oayapa supekowosla in fwakak, ac ac fwa oasr ku lomwos in sista timon u."

Mark 3:13-15



Oasr sie met kol lun met Jew pangpang Nicodemus, su ma in U lun met Pharisee. Sie fong ah el som nu yurin Jesus ac fwak nu sel, "Rabbi, kut etu lah kom sie met luti supeyukme sin God. Wangin sie met ku in oru menmen ma kom oru God El fwin tia oelul."

Jesus el fwak, "Nga fwak na paye nu sum: sie met el fwin tia sifwil isusla, el koflana liye Togusrai lun God."

Na Nicodemus el siyuk sel, "Sie met matu ac sifwilpa osweyukla fuka? Mea, el ku in sifwil ilyak nu insien nina kial ac isusla pacl se akluo?"

Jesus el topuk, "Nga fwak na paye nu sum: sie met el fwin tia isusla ke kof ac Ngun, el koflana ilyak nu in Togusrai lun God. Monin met se osweyukla sin papa ac nina, a moul in ngun osweyukla ke Ngun lun God."

John 3:1-6






Tia paht tukin ma inge, Jesus el som nu in sie siti pangpang Nain, ac met tumal lutlut, oayapa sie U lulap, elos oelul. In pacl se na ma el sun mutunpot nu in siti u, pukmas se akola in orek, ac met u oatui ke mutunpot u. Met se ma misa u el mwen sefanna nutin katinmas se, ac sie un met na pus elos wi katinmas sac tufoki. Ke Leum el liyal, el arulana pakomutal, ac el fwak nu sel, "Nimet tung." Na el fwasryang ac kahlye box in mas sac, ac met ma wis u elos tui. Jesus el fwak, "Mwen se! Nga fwak nu sum, tukakek!"

Na met misa sac tukakek ac el mutawauk in kaskas, ac Jesus el esalang nu sin nina kial ah.

Elos nukemwa arulana sangeng, ac elos kaksakin God ac fwak, "Sie met palu fulat sikyak inmaslosr! God El tuku in molela met lal!"



Jesus el ngetla liye lah sie un met na lulap tuku nu yorol, ke ma inge el siyuk sel Philip, "Kut ac konauk oya mongo ma fal in kiteya U na lulap se inge?" (El fwak ma se inge in srikal Philip -- el etu tari ma el ac oru.)

Philip el topuk ac fwak, "In kitalos nukemwa ke ipin bread na srisrik se, ac yok liki ipin silver luofoko kut ac enenu."

Andrew, sie pac sin met tumal lutlut, su ma lel Simon Peter, el fwak, "Tulig mukul se oasr inge su oasr lof in bread barley limekosr ac ik lukwa sel. Tusruktu sufal na paye in sang kiteya met inge."

Jesus el fwak nu selos, "Fwak nu sin met u in muta nu ten." (Acn na mahma se pa inge.) Ouinge met nukemwa muta; sahp ac oasr tausin limekosr ma met mukul. Jesus el eis bread u, sang kulo nu sin God, ac kitalik nu sin met nukemwa su muta in acn sac. El oru oapana nu ke ik ah, na elos nukemwa eis fal nu ke enenu lalos. Ke elos nukemwa kihpi, el fwak nu sin met tumal lutlut, "Orani ma yolyak an, tuh kut in tia kunausten." Ouinge elos orani luwen mongo u ac nakla foteh singoul luo ke ma yolyak ke lof limekosr ma met ah mongo kac.

Ke met u liye menmen ma Jesus el oru inge, elos fwak, "Payena lah pa inge Met Palu se ma ac tuku nu fwalu!"



Ke ekela, met tumal lutlut lun Jesus elos tufokla nu ke lulu sac, sroang nu fwin oak soko, ac kal in folokla nu Capernaum. Inge lohsrani tari, a Jesus el soenna tuku nu yorolos. In pacl sac eng na upa se tuhyak, ac fwin kof u pulkulakyak. Met lutlut elos kal mael tolu ku akosr, na elos liyalak Jesus lah el fwasr fwin kof u, ac apkuranyang nu ke oak okalos, na elos toninfongla. Jesus el fwak nu selos, "Nik komwos sangeng. Nga pa inge!" Na elos enganak ac srakulang nu fwin oak u, ac in pacl sac na oak u sun pe acn ah, yen ma elos kal nu we.



Kutu met u wise tulig natulos nu yurin Jesus tuh elan fwiliya paol faclos, a met tumal lutlut elos kai met ah. Ke Jesus el liye, el arulana toasr ac fwak nu sin met tumal lutlut, "Lela tulig srisrik ingan in tuku nu yuruk ac nimet ikololosi, tuh Togusrai lun God ma lalos su oh elos. Payena nga fwak nu sumwos, el su tia eis Togusrai lun God oana sie tulig srisrik, fwa koflana ilyak nu loac." Na el srukak tulig srisrik u ac fwiliya paol fwin kais sie selos, ac akinsemwowoyalosla.

Mark 10:13-16

Na Mary el fwak, "Nga met kulansap lun Leum God. Lela ma inge in orek nu sik oana ke kom fwak." Na lipufan sac som lukel.

Luke 1:38




"Nga met shepherd mwo, su akola in misa ke sheep u."

John 10:11

"Sheep nutik porongo pusrek. Nga etalos, ac elos fwasr tukuk. Nga sang moul kamwil nu selos, ac elos fwa tiana misa. Wangin met ku in tulakunulosla likiyu."

John 10:27-28



Ke ma inge met tol fulat ac met Pharisee elos osun yurin Met Pwapa Fulat ac fwak, "Mea kut ac oru, ke arulana pus menmen ma met se inge orala? Kut fwini fuhlela elan oru na lumah inge, met nukemwa ac lulalfongel lac, ac met leum lun acn Rome elos ac sroang nu kac, ac kunausla Tempul lasr oayapa mutunfwal sesr."

Sie selos pangpang Caiaphas, su tuh Met Tol Fulat ke yea sac, el fwak, "Efu komwos ku lalfon fwuk? Komwos tia akilen lah ac mwo nu sumwos tuh met se na in misa ke met u, liki mutunfwal nufon se in kunausyukla?" Payeiya u, Caiaphas el tia fwak ma inge ke nunak na lal, a ke sripen el pa Met Tol Fulat ke yea sac el fwak kas in palye kac Jesus lah el ac misa ke sripen met Jew, ac tia kaclos mukena, a oayapa in esani nu sie met nukemwa lun God su fwasrelik nu yen nukemwa u.

Tukin len sac lac, met fulat lun met Jew elos suk na oreya in unilya Jesus.




Ke ekela, Jesus ac met tumal lutlut singoul luo elos mutani in mongo. Ke elos mongo, Jesus el fwak, "Payena nga fwak nu sumwos, sie sumwos ac tukakinyuyak."

Met tumal lutlut elos arulana suparla ke kas inge, ac kais sie selos mutawauk in siyuk sel, "Leum, ya nga pa kom fwak u?"

Na Jesus el fwak, "El su wiyu isongya bread nal nu in ahlu se inge, el pa ac tukakinyuyak."

Matthew 26:20-23



Oasr pac met luo saya, kemwa na met orekma koluk, wi pac penyukla in tuh wi Jesus anwuki. Ke elos tuku nu ke acn se pangpang "Sri in Ahlunshf" elos patkilya Jesus nu fwin sakseng soko, oayapa met koluk luo ah, sie layen layot ac sie layen lasa sel.

Luke 23:32-33


Sie sin met koluk ma wi sripsripyak u fwak kas in angonkas nu sel: "Mea, tia kom pa Christ? Molikomla sifacna, ac kital u!"

A met se ngia kael ac fwak, "Ku kom tia sangeng sin God? Kom oelul eis kain kaiyuk sefanna. Fal ma orek nu sik kom u, meyen kut eis lacnen orekma koluk lasr. A el, wangin kutena ma koluk el oru." Na el fwak nu sin Jesus, "Jesus, esamyu ke kom tuku ke ku lun Togusra!"

Jesus el fwak nu sel, "Payena nga fwak nu sum, misenge na kom ac wiyu in Paradise."

Luke 23:39-43








Ke apkuran nu ke infulwen len, in poloa acn sac nufon lohsrla ke lusen aur tolu. Kalmen faht u wanginla, ac nuknuk lisingyen Acn Mutal Na Mutal ke Tempul u mihsalik infulwa ip luo lac. Jesus el wola ke sie pusra lulap ac fwak, "Papa! Nga asot ngunik nu in poum!" El fwakla ma inge, na el misa.


Met kol lun un met meun el liye ma sikyak inge, ac el kaksakin God ac fwak, "Payena met se inge el sie met na sumwos!"

Luke 23:44-47





Ke ekela, sie met kasrup in acn Arimathea el tuku; eel pa Joseph, ac el sie pac met lutlut lun Jesus. El utyak nu ye mutal Pilate ac siyuk ke monin Jesus, ac Pilate el sap in etukyang monin Jesus nu sel Joseph. Ouinge Joseph el eisya manol ac nokmulla ke nuknuk linen sasu se, ac fwiliya in kulyuk se lal sifacna su el tufwana taflela in eot u. Tari el epusang eot na lulap se sang kosrala mutun kulyuk u, na el som. Mary Magdalene ac Mary se ngia eltal muta we, tulanot kulyuk sac.

Matthew 27:57-61



Toang na ke len se emeet in wik, mutan inge som nu ke kulyuk u, wis me keng ma elos akoela ah. Elos liyeak lah eot sac ipihsyukla liki mutun kulyuk sac, na elos utyak nu loac; tusruktu elos tiana konauk monin Leum Jesus. Elos tu in sac, arulana fohsak ke ma inge, ac in kitin pacl ah na met luo tu me siskalos ac nukum nuknuk na saromrom. Ac elos arulana sangeng, ac faksufi ke met luo ah fwak nu selos, "Efu komwos ku suk el su moulin masrlon met misa? El tia oasr inge; el akmoulyeyukyak tari. Esam ma el tuh fwak nu sumwos ke el tuh muta Galilee ah: 'Mwen Nutin Met el ac fwa etukyang nu in poun met koluk, ac el ac fwa anwuki fwil sakseng soko, na tukin len tolu el ac fwa sifwil moulyak.' "

Na mutan u elos esamak kas lal inge.




Eltal sulaklak na tuyak ac folokla nu Jerusalem ac konauk met tuma lutlut singoul sie, wi kutu pac met saya u, su fwak nu seltal, "Payena lah Leum el moulyak! El sikyang nu sel Simon!"

Na met luo ah akkalemye nu selos ma sikyak inkanek ah, ac ke eltal akilenak Leum ke el kunsalik bread u.

Ke pacl se eltal srakna srumun ma inge, Jesus sifacna el sikyak inmasrlolos ac fwak nu selos, "Misla nu sumwos."

Elos arulana toninfongla, ac nunku mu elos liyauk inut se. Na el fwak nu selos, "Efu komwos ku sangeng? Efu komwos ku alolo in nunak lomwos u? Ngetma liye pouk ac niuk, ac liye lah nga pa inge. Kahlyuwi na komwos ac fwa etu na paye, tuh inut u wangin ikwa ac sri kac oana ke komwos liye keik u."

El fwak ma inge, ac kolang paol ac nial nu selos.



Ac el fwak nu selos, "Pa inge ma simla u: Christ el ac fwa keok, ac el ac fwa moulyak liki misa ke len se aktolu, ac ke eel, peng ke auliyak ac nunak munas ke ma koluk enenu in lutiyuk in fwal nukemwa, mutawauk Jerusalem. Komwos met loh ke ma inge.

Luke 24:46-48

Na el kolosla nu likin siti u ac som apkuran nu Bethany, ac el srukak paol nu faclos ac akinsemwowoyalos. Ke pacl se el akinsemwowoyalos inge, el som lukelos, ac utukyak el nu in kosrao.

Luke 24:50-51

Tuh God El lungse fwalu ouinge: El ase Mwen sefanna natul, tuh elos nukemwa su lulalfongi in el fwa tia misa, a elos fwa eis moul ma patpat. Tuh God El tia supama Mwen natul in tuh nununku fwalu, a tuh fwalu in eis moul kacl.

Kutena met su lulalfongi in Mwen el tia nununkeyuk; tusruktu kutena met su tia lulalfongi, el nununkeyuk tari, meyen el tia lulalfongi in Mwen sefanna nutin God.

John 3:16-18

Kut fwin fwak mu wangin ma koluk lasr, kut sifacna kiapekutla ac wangin ma paye in kut. A kut fwin fwakak ma koluk lasr nu sin God, El ac fwa akpayei mwulela lal ac oru ma sumwos: El ac fwa nunak munas nu sesr ke ma koluk lasr, ac aknasnasye kut liki ma sufal nukemwa lasr.

Sie John 1:8-9

Jesus el topkol ac fwak, "Nga pa inkaneke, ac paye, ac moul; wangin met som nu yurin Papa fwin tia ke nga."

John 14:6

"Fwasru nu yuruk, komwos su orekma ac totola, tuh nga fwa sot mongla nu sumwos. Eis srenenu luk nu fwomwos ac lutlut sik, tuh nga fakpap ac insepusisel; ac komwos fwa konauk mongla. Tuh srenenu luk fisrasr, ac me utuk luk mulala."

Matthew 11:28-30

Jesus el oru pac menmen puspis ye mutun met tumal lutlut, a tiana simla in buk se inge. Tusruktu ma inge simla tuh komwos fwa ku in lulalfongi lah Jesus pa Christ, Mwen nutin God, ac tuh ke lulalfongi lomwos in el, komwos fwa ku in eis moul.

John 20:30-31

"Nga pa oemeet ac oetok, mutawauk ac safla."

Fwackyuk 22:13





Yac pre se inge fahklah ma oan in nuhnak lom an?

Fin ahok, na kom pre ke pre se inge, ac Christ el ac fah utyak nuh in moul lom an, oana ke el mwulelah uh.

"Leum Jesus, nga akinlen lah nga sie mwet koluk, ac enene kom nuh in moul luhk. Nga kulo ke kom misac fin sahseng ac wislah ma koluk luhk. Kulo ke kom nuhnak muhnahs ke ma koluk luhk, ac acse nuh sik moul ma pahtpaht. Nga suli kom nuh in moul luhk tuh kom in Mwet Lango luhk ac Leum luhk. Nuhnak muhnas, karingin ac nuhnuhkuh moul luhk. In Een Jesus nga pre, Amen"

Suhmuhslah eem \_\_\_\_\_ Lwen misenge uh \_\_\_\_\_

Sroallah sel: Linda Riddell

Simlac sel:  
Little Palm Press  
P.O. Box 541215  
Merritt Island, Florida 32954-1215

